

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 2633 del 31/08/2022

Traduzione in ladino

Dì de l'Autonomia: tel Teater sozièl la zerimonia col concert del cor Sat

L Trentin, raion de coleament anter Mitteleuropa e l raion mediteran, l é bon, de gra a sie endrez istituzionèl particolèr, de meter adum svilup, atenzion per l ambient e stravardament de la identitèdes linguistiches e culturèles. Chesta la sintesa de la storia de nosc raion e de sie endrez spezièl de autogoern, che chest an fèsc cincanta egn del Secont Statut de Autonomia (1972-2022). Chest l vegnarà recordà tras n program rich de scomenzadives, metù a jir de firé e che l se serarà su la Dì de l'Autonomia en lunesc ai 5 de setember del 2022. Da les undesc da doman te Palaz provinzièl te Piazza Dante vegnarà endrezà l'inaudazion de la mostra permanenta "La Provincia si racconta. Un viaggio tra storia, presente e futuro dell'autonomia trentina", da les nef da sera te Teater sozièl de Trent sarà na sera rica de storia e de emozions a chela che tolarà pèrt i raprejentanc de la istituzions de l'autonomia. L program l perveit la consegna de la onerifienza de l'ègua de Sèn Venceslao e l concert del Cor de la Sat-Società degli alpini tridentini, per contèr ence tras la musega l leam co la monts e l raion trentin. La sera la é orida a la jent, se pel ite debant enschin a canche l é post.

L program l perveit tel scomenz i intervenc del president del Consei de la Provinzia autonoma de Trent, del president del Consei de la autonomies locales, del president de la Provinzia autonoma de Trent.

Do ge vegnarà dat su l'onerifienza de l'ègua de Sèn Vanceslao a Günther Platter, Capitan del Tirolo dal 2008. Platter, 68 egn, per vèlch an l é stat tipograf e do l à fat servije desche ofizièl de la gendarmeria, tinultima, te la metà di egn Otanta, l se à dat ju te la politica dant desche conseier e do desche ombolt de Zams, tel Tirol. L é member del Goern tiroleis dal 2000 en ca, l é stat ence Minister federèl de la defendura e del intern de la Republica de l'Austria.

L protagonist de la sera sarà do l Cor de la Sat, per chel che no serf prejentazions. L grop l é stat metù su a na vida ofizièla a Trent ai 25 de mé del 1926 col inom Coro della Sosat, do, ti egn Trenta, l é stat mudà te Coro de la Sat, canche l se à portà dant te la Sala grana del Ciasstel del Buonconsiglio. L é stat ret tel scomenz da Enrico Pedrotti enschin del 1938, do da Silvio Pedrotti per più che cincanta egn e ades da Mauro Pedrotti, nez de Silvio e fi de Mario. L cor l à ciantà te più che mile conzerc te la Telia, te la Europa, (Austria, Belgio, Cecoslovacchia e ades Repubblica Ceca, Danimarca, Finlandia, Francia, Germania, Gran Bretagna, Olanda, Russia, Svizra), te l'America (Brasile, Canada, Messico, Stati Uniti) e te l'Asia (Corea), ti teatres più de nonzech. Sacotanta la edizions de la 300 cianties del repertorie e la incijions, che tol ite cheles dal 1993 enschin a cheles più neves per endrez de la Fondazion Coro Sat (nef cd e un dopie cd con presciapèch 200 cianties dal 1996 al 2015).

Traduzion di Servijes Linguistics e Culturèl del Comun general de Fascia

(Traduzione a cura dei Servizi Linguistici e culturali del Comun general de Fascia)

(cdt)